



UPA 2015/139  
Justus Hansen  
27. maj 2015

**Inuusuttut suliffissaaleqinerat qanoq iliuuseqarfigineqarnera qanorlu akiorniarneqarnera pillugu apequteqaat aallaavigalugu oqallisissiaq.**

(Inuit Ataqtigiit Inatsisartunut ilaasortaataat)

Inuusuttut suliffissaaleqinerat ajornartorsiutaavoq ilumoortoq. Inuusuttut suliffissaaleqisussaangillat. Inuusuttut ilinnialersimangikkunik sulisussaapput. Tamatta tamanna isumaqatigiissutiginguatsiarparput. Ajoraluartumilli piviusut allarluinnaapput. Inuusuttut amerlavallaqaat ilinnialersimangitsut imaluunniit suliffeqanngitsut. Tamanna akiortariaqarparput.

Alloriarneq siulleq angerlarsimaffimmi pissaaq. Inuiaqatigiinni angajoqqaarpasuit akisussaassuseqarlutik inuupput, qitornaminnik perorsaallutik taamaasillutillu qitornatik kaamilluartarlugit. Ajoraluartumilli suli angajoqqaat amerlavallaarput, akisussaassutsiminnik paasinnissimangitsut. Meeqqat akisussaassuseqarneq ilinniassavaat aamma meeqqat killissatik ilinniassavaat. Assersuutigalugu aalajangersimasumik innarfeqartillugit pineqalersinnaapput, meeqqat atuarnerinut soqutinninneq takutinneqarsinnaavoq piumasaralugulu atuakkerisassasut, angerlarsimaffimmi suliassaalunnguanik tunisarnerisigut. Assersuutissarpaalussuit taamaaliorlunga taagorsinnaagaluarpakka.

Pisarali tassaavoq, inuiaqatigiit kisimik suliassarinnikkaat inuusuttut akornanni suliffissaaleqisoqarnera - aamma angajoqqaat tamanna suleqataaffigissavaat.

Demokraatini qularinngilarput angajoqqaat qitornaminnut piumasaqarnerusalerpata taava tamanna atuarnerannut pitsaasumik sunniuteqassaaq, taamaasillutik meeqqat piumasseqarnerulissaapput allaat ilinniagaqalersinnaallutik taamaasillunilu suliffeqalernissaannut.

Taamatulli oqareerlunga inuiaqatigiinniittuartoqartussaavoq immikkut ikiorneqarnissaminnik pisariaqartitsisunik, qanorluunniit angajoqqaat ilinniartitsisullu sorsutsigigaluarpata. Eqimattat taaku ikiorneqassapput aamma. Tassani Piareersarfiit neqeroorutissatsialaapput Demokraatinilu iluarisimaarparput ukiuni aggersuni Piareersarfiit amerlanerusunik aningaasaliiffigineqassammata. Pingaaruteqarpoq inuusuttunik tiguisinnaasumik peqartoqarnissaa.



Naggataatigut aamma inuusuttut suliffissaaleqisut piunasaqarfigineqarnerusariaqarput. Assersuutigalugu kommuni piunasaqarsinnaasariaqarpoq, inuusuttut ataasiakkaat pisortanik ikiorsiissutisiatik piunallutik iliuuseqartariaqartut. Inuiaqatigiinni suliaassat annikitsualuit soorlu pinngortitami saliineq, illoqarfinni nunaqarfinnilu saliineq assigisaallu suliaritinneqartarsinnaapput. Inuusuttut misigisimalissapput iluaqutaallutik aamma immaqa imaassinnaavoq ilinnialernissaminnut sulilernissaminnulluunniit kajumissuseqarnerulersut. Pisortat ikiorsiissutaasa inuusuttunut tuniunneqartarnerannut apeqqutaassaaq inuusuttut takkuttarnerusut iluaqutaasarnersullu. Taamatut suliniuteqarnikkut inuusuttut nammineerlutik suliffissarsiornissaminnut kajumittunngortinneqassapput.

Demokraatini kissarpugut oqallilluarumaartusi.